

Ilanngussaq 1**Tusarniaanermiit allakkiaq**

Siunnersuut tusarniaassutigineqarsimavoq piffissami 29. april 2024 -imiit 28. maj 2024 -imut, Naalakkersuisut tusarniaanernut quppersagaanni tamanut saqqummiunneqarluni, nassiunneqarlunilu tusarniaavigineqartartunut tulliuttunut:

Naalakkersuisut Siulittaasuata Naalakkersuisoqarfia
Ineqarnermut Attaveqaasersuutinullu Naalakkersuisoqarfik
Aningaasaqarnermut Akileraartarnermullu Naalakkersuisoqarfik
Aalisarnermut Piniarnermullu Naalakkersuisoqarfik
Isumaginninnermut, Ilaqutariinnut, Suliffeqarnermut Nunamullu Namminermt
Naalakkersuisoqarfik
Ilinniartitaanermut, Kultureqarnermut, Timersornermut Ilageeqarnermullu
Naalakkersuisoqarfik
Naalagaaffinngornissamut Nunanullu Allanut Naalakkersuisoqarfik
Nunalerinnermut, Imminut Pilersornermut, Nukissiuuteqarnermut Avatangiisinullu
Naalakkersuisoqarfik
Meeqqanut Inuusuttunullu Naalakkersuisoqarfik
Peqqissutsimut Naalakkersuisoqarfik
Avannaata Kommunia
Qeqqata Kommunia
Qeqertalik Kommunia
Kommuneqarfik Sermersooq
Kommune Kujalleq
Sulisitsisut
Sulinermt Inuusutissarsiuuteqartut Kattuffiat (SIK)
Akademikernes Sammenslutning i Grønland (ASG)
Lærernes Fagforening i Grønland (IMAK)
Nunatsinni Perorsaasut Kattuffiat (NPK)
Peqqinnissaq Pillugu Kattuffiat (PPK)
Kalaallit Nunaanni Aalisartut Piniartullu Kattuffiat (KNAPK)
Avannaani Inuusutissarsiortut
Qeqertalik Business Council
Arctic Circle Business
Sermersooq Business
Innovation South Greenland
Kommunini Pilersaarusiornernut Oqartussat
Explore North Greenland

Destination Arctic Circle
Sermersooq Business
Innovation South Greenland
Destination Diskobay
Eastgreenland.com
Visit Greenland
Nalik Ventures
Air Greenland
Eqqartuussissuserisut Nuna advokater
Eqqartuussissuserisoq Arctic Law
Eqqartuussissuserisut Malling & Hansen Damm
Eqqartuussissuserisoq Meinel
Eqqartuussissuserisoq Gedion Jeremiassen
Eqqartuussissuserisut Inuit Law
Eqqartuussissuserisoq Naja Joelsen
Eqqartuussissuserisoq Aviâja Helms
Eqqartuussissuserisoq Marie Louise Frederiksen
Kukkunersiuisut Grønlands Revision
Kukkunersiuisut Deloitte
EY
BDO
Air Greenland
Grønlandsbanken
Banknordik

Tamatuma saniatigut tusarniaassutaasut immikkut nassiunneqarputtaa takornariartitsinermi akuersissuteqarfiusunut atuuttunut.

Tigusaqartoqarpoq tusarniaanermi akissutininik tusarniaavigineqartunit ukunannga: Sulisitsisut, Qeqqata Kommunia, Kommuneqarfik Sermersuumi Inuussutissarsiornermut immikkoortortaqarfik, Lings Hunting Greenland ApS, Arctic Circle Business, KNAPK, NPK, SIK, Visit Greenland, Nomad Greenland, Aningaasaqarnermut Akileraartarnermullu Naalackersuisoqarfik, Erik Lomholt-Bek, Grønlandsbanken, Ineqarnermut Attaveqaasersuutinullu Naalackersuisoqarfik, Kommune Kujalleq, aamma Avannaata Kommunia.

1. Sulisitsisut allapput:

- 1.1 Tusarniaavigineqartup tikkuarpaa siunnersuummi § 20 [maanna § 13], tassani piumasaqaateqartoqarmat aktiaatit imaluunniit piginneqataassutit 2/3 -iisa inunniit

ataasiakkaanit pigineqarnissaat, maanna najugaqartunit, annertuumik killiliisuusioq takornariatitsinerup ineriartortinnissaanut akuersissuteqarfiusut iluanni. Tusarniaavigineqartup oqaatigaa aqutsinerit inerisaanissamik killilersuisut killilersuutaasut aningaasarsiornikkut imminut napatilernissamut.

Tusarniaavigineqartup oqaatigaa siunnersuut pissutsillu allat, soorlu maanna akerleriit suliassanngortitsisarfianni voldgift-imi suliaq ingerlanneqartoq, aatsitassanut inatsimmi allannguutit, annikitsunik ujarlersinnaanernut inatsit nutaaq aamma aalisarnernut inatsit kinguneqartut aningaasalersuisinnaasut unammillertartumik inissisimalernerannik, aamma nunatsinni ingerlatseqatigiiffiusunut takornariatitsinermik ingerlatsisunut attuuttumik, niuertarfeqarnermi inuussutissarsiutinullu allani suliniutissat aningaasaliissutissallu unitserarneqarlutik. Tusarniaavigineqartup inassutigaa taamaattumik aalajangersagaq peerneqassasoq. Tamatumunngalu ilaliullugu oqaatigineqarpoq aalajangersakkami suna siunertaanersoq ersernerluttoq, tamatumalu taarsiussassanik siunnersuuteqarsinnaaneq ajornarnerulersikkaa. Erseqqissarneqarpoq najukkani namminerni ingerlatsisusut aalajangersakkakkut iluaqutissarsissanngitsut, takornariatartut amerliartorsinnaanerat taamalu aningaasarsiornikkut isaatitsinnaaneq malunnaatilimmik killilersorneqassammata.

- 1.2 Paasissutissanik avitsepatigiittarneq pillugu aalajangersakkamut tunngatillugu, § 26 [maanna § 19], tusarniaavigineqartup inassutigaa aalajangersagaq annikillineqassasoq avitsisoqarnissaanik pisariaqartitsiviusunut. Tusarniaavigineqartut fagitigut tunngavissaqartitsinngillat soq periarfissaassanersoq Namminersorlutik Oqartussat suliffeqarfiutaannut paasissutissanik avitseqateqarnissamut. Tusarniaavigineqartup ersersippaa ernumaneq pasilliinermut inuussutissarsiornikkut isertugaatit Namminersorlutik Oqartussat suliffeqarfiutaannut ingerlatinneqartarnissaannik. Aamma ernummatigaat tamanna pisortanit unammillerneqarnermut tunngaviusinnaasoq, aningaasaliiumassutsimullu akornutaasinnaalluni, najukkani namminerni aamma nunanit tamalaanit aningaasaliisartut akornanni.
- 1.3 Qularnaveeqqusiisarnermut atatillugu aalajangersakkamut, § 27, imm. 2 [maanna § 26, imm. 2], tusarniaavigineqartup oqaatigaa ersittoq ”pissutsit allannguuteqartut pisariaqatilerpassuk Naalakkersuisut aalajangersakkanik allannguisinnaapput, matumani aamma qularnaveeqqusiisarnernut.” Oqaatigineqarpoq inatsisissamut nassuiaatitut oqaaseqaatini ersittoq matumani pineqartut allannguutit imaluunniit illuutinik aamma sanaartukkanik allilerinerit. Tusarniaavigineqartup oqaatigaa tamanna isigineqartoq inatsimmut oqaaseqaatitsigut inatsisiliornertut, aammalu aalajangersagaq equilluanngitsoq.

Naalakkersuisoqarfiup suliami oqartussaasup oqaaseqaatai:

1.1. -imut

Siunnersuutigineqartoq aalajangersakkamut maanna malittarisassaasunik sannaqarpoq. Maanna atuuttoq piumasaqaat tassaavoq inuit allattorsimaffianni nalunaarsorsimanissaq ukiuni 2 -ni. Siunnersuutigineqartoq taamaasilluni piumasaqaataanngilaq nutaaq, kisiannili atugassarititaareersumik atuuttunik sukatsineq.

Naalakkersuisut sukatsinissamik siunnersuuteqarnerannut tunuliaqutaavoq qularnaarumaneqarmat takornariartitsinermik inuussutissarsiummi siuariartortoqarnissaanik qularnaariniarneq najukkani innuttaasunut iluaqutaasumik.

Naalakkersuisut tusarniaanermi akissuteqaatit aallaavigalugit aajalangersakkami nalimmassaapput, massakkullu aktiaatileqatigiiffimmi piginneqatigiiffimmiluunniit aningaasaatinik piginnittut 2/3 Kalaallit Nunaanni najugaqartariaarutsillugit, maanna piginnittuusut “affai sinnerlugit” Kalaallit Nunaanni najugaqartariaqalerput.

1.2. -mut

Paasissutissanik avitseqatigiittarnissamik pisariaqartitsineq taamaallaat tunngaveqarpoq akuersissummut atatillugu sulianik ingerlatsisoqartarnera. Assersuutigalugu paasissutissat qinnuteqartoqarneranik, Naalakkersuisoqarfiullu oqaloqateqarnermik aallartitsisarnera, pissutsinut atuuttunut qanoq isiginnittoqarnersoq, sumiiffimmi uumasooqassusianik nalilersuinerit imaluunniit assigisaat. Aalajangersagaq atornerqarsinnaasussaannngilaq paasissutissanik Namminersorlutik suliffiutaallu avitsisarnikkut niuerfusuni unammilleqatigiinnerup innarlerniarneqarsinnaaneranut.

1.3. -mut

Allannguinnissamut piumasaqaataasoq qularnaveeqqusiisarnermut aallaaveqarpoq piginnaatitsissummik pigisaqartup nammineq akuersissummut kissaataanik. Matumani anguniarneqarsimavoq erseqqissaaniarneq aalajangersakkamut nassuiaatitut oqaaseqaatinik ersarissaanikkut.

2. Visit Greenland allappoq:

- 2.1 Tusarniaavigineqartup oqaatigaa aalajangersakkatut siunnersuutaasumut ataatsimut isigisumik tapersiineq.
- 2.2 Tusarniaavigineqartup akuersaarpai ilinniagaqarnissap aamma piginnaasanik ineriartortitsinissap pingaarutai, akuersissummik allaffissornikkut ingerlatsinermi. Illuatungiusup taamaattumik siunnersuutigaa ilanngussisoqassasoq

piumasaqaammik pikkorissartarnissanut akuersissutinik suliaqarnernut - management – akuersissummik tunineqarsinnaassagaanni.

- 2.3 Illuatungiusup nersualarpaa kommunit periarfissaqalernissaat aalajangersarneqartartunut sunniuteqarnerulernissamik, nalilersuisarnernut ataatsimiititaliat aqqutigalugit. Taamaattoq oqaatigineqarpoq ernummataasoq § 5 - imik [maanna § 7]. oqaasertaliisimaneq eqqarsaatigalugu. Siunnersuutigineqarpoq nalilersuisarnermik ataatsimiititaliat pinngitsoorani atuuttarnissaat, qularnaarumallugu assigiiaartunik akimullu ersittunik ingerlatsisoqarnissaa kommunit assigiinngitsut akimorlugit. Tusarniaavigineqartup siunnersuutigaa aalajangersagaq "saaq".
- 2.4 Tusarniaavigineqartup tapersersorpaa aalajangersakkap atortuulernissaa qinnuteqaat suliarineqarsinnaassasoq nutaamik neqeroortitsinani, pisortat tamanut ammasumik qinnuteqaqqusinerat akuersissuteqarnissamut piginnaanilinnik allanik takkuttoqarneranik kinguneqanngippat, imaassimappat qinnuteqaat qinnuteqaat tiguneqarsimasoq piffissaliussap naareerneraniit qaammatit 18 -it qaangiutinnagit.
- 2.5 Killiliinermut inuit Kalaallit Nunaanni inuit allattorsimaffianni nalunaarsorsimanngitsut akuersissummi aalajangersakkat naapertorlugit ingerlatsisinnaannginnerannut oqaaseqaateqartoq nalunaarpoq tamanna pisariaqartumik ilassutaasoq, qularnaarumallugu najukkami aningaasarsiornikkut soqutigisat ineriartornissaat piujuaannartitsinerlu.
- 2.6 Tusarniaavigineqartup oqaatigaa pingaaruteqartoq qularnaassallugu avatangiisinik illersuinissamut pisussaaffiit eqqortinneqarnissaasa qularnaarnissaat, § 13, imm. 5, aamma § 24, imm. 6 aamma imm. 7 -imi pineqartut [pisinnaatitsissummik piginnittup saliisariaqarneranut pisussaaffii maanna § 17, imm. 2, nr 6 aamma 7-mi aalajangersarsimalerput]. Illuatungiusoq inassuteqarpoq ilanngussisoqassasoq innersuussinermik avatangiisuini annertussusissanut naleqquttunut, kiisalu erseqqissarneqassasoq qanoq eqqortitsisoqarnera nakkutiginiarneqarnerasoq. Matumani aamma pisortani oqartussat kikkut nakkutilliinermut akisussaanersut.
- 2.7 Tusarniaavigineqartup taperserpaa piffissap akuersissuteqarfiusup tunniunneqarsinnaanissaa piffissamut ukiut 10 -it angullugit sivisussusilimmut, kiisalu ukiunut 20 -inut sivitsuisinnaanermut periarfissaqartitsisoqarluni. Tusarniaavigineqartup piffissaliussap ataatsimut tamarmiusup ukiunut 30 -inut inissinneqarsinnaanera ersarissunik killiliussanik pilersitsissaaq, ataqatigiissitsisoqarlunilu akuersissutinik ingerlatsinermi.

- 2.8 Tusarniaavigineqartup oqaatigaa piginnittuunermi allannguutissatut siunnersuutaasut nukittorsaasussaasut najukkani namminerni nakkutilliinermik aningaasarsiornerullu imminut napatissinnaaneramik, ilutigisaanillu unammillernartunik pilersitsilluni nunanit allaneersunut ingerlatsisunut imaluunniit aningaasalersuisunut ingerlatseqatigiiffinnut ingerlanerlioreersunut pitsaanngorsaaniarnissamut.
- 2.9 Tusarniaavigineqartup pisussaaffimmut kalaallinik atorfinititsisarnissamut sulisitsinissamullu tunngatillugu oqaatigaa piumasaqaatini immikkuualuttortalersuinerit amigaataasut, kalaallit sulisussat kikkuuneri eqqarsaatigalugit. Tusarniaavigineqartup inassutigaa inuit allattorsimaffiat aallaavigineqassasoq.
- 2.10 Sillimmasiisarnermut aamma qularnaveeqqusiisarnermut atatillugu oqaaseqaateqartup oqaatigaa suliniutit piginnaatitsissummik pigisaqartup peqqinnissaqarfimmut isumaqatigiissuteqarnissaanik peqqissutsimut atasunik kiffartuussinernik tunisaqartarnissamik, matumani aamma takornarianik annaassiniartarnernik / ikiorsiisarnernik, sillimmasiisarnernullu aningaasartuutissanut matussutissanut atasunik, qularnaarneqassasoq ajornartoormi pisut qanoq aqunneqartarnissaat.
- 2.11 Tusarniaavigineqartup oqaatigaa piffissamut ikaarsaariarfiusumut aalajangersakkat eqaatsumik ikaarsaartoqarnissaa qularnaaraat.

Naalakkersuisoqarfiup sulianut oqartussaasup oqaaseqaatai:

2.1. -imut

Oqaaseqaateqarnissamut pissutissaqartitsinngillat.

2.2. -mut

Naalakkersuisut tusarniaavigineqartup isummersuutaat isumaqatigaat pissusissamisuussammat ingerlatsinerit ilaanni naleqquttuusassasoq tigussaasumik ilinniakkatigut piginnaaneqarnissaq. Akuersissutilli assigiinngiaartuupput, taamaattumillu Naalakkersuisut naleqquttuutinngilaat piumasaqaatinik pineqartutut nalunaarsuinissaq.

2.3. -mut

Kommunit tamarmiusut ilaasa kissaatiginngilaat sumiiffimmini akuersissuteqarfiusartunik peqarnissaa. Tamanna aamma kommuninit akissutigineqartuni siunnersuutip

tusarniaassutigineqarnerani ersippoq. Tamanna tunuliaqutaralugu aalajangersagaq “sinnaavutut” oqaasertaligaavoq. Akuersissuteqarfiusinnaasunik nunaminertanik immikkoortitsisoqarsimatillugu suleriaasiusinnaavoq suliassat ingerlanneranni nalilersuisartunik ataatsimiititaliamik pilersitsisoqarnissaa.

2.4. -mut

Oqaaseqarfiginissaanut pissutissaqanngilaq.

2.5. -imut

Oqaaseqarfiginissaanut pissutissaqanngilaq.

2.6 -imut

Avatangiisinut atatillugu pisussaaffinnik naammassinnittoqartarneranik nakkutilliinermi pineqarput pisinnaatitsissummik pigisaqartup pisussaaffii akuersissutip atorunnaarnerani. Naalackersuisut imaluunniit oqartussat allat imaluunniit kommunit nakkutilliinissamik suliassinneqarsimasut § 34, imm., 3 naapertorlugu suliani akisussaapput.

Nakkutilliineq piginnaatitsissummik pigisaqartup pisussaaffimminik naammassisaqartarneranik akuersissutip atorunnaarnerani sunniuteqanngilaq Naalackersuisut pisussaaffiitut qularnaarinissamik mingutsitsisoqannginneranik pinngortitami avatangiisinilu. Tamanna aqunneqarput inatsisitigut avatangiisinut aamma pinngortitamut tunngasuni.

2.7. - imut

Oqaaseqarnissamut pissutissaqartitsinngilaq.

2.8. -mut

Ilassutitut oqaaseqarnissamut pissutissaqartitsinngilaq. Taamaattoq takukkit 1.1. -imut oqaaseqaatigineqartut.

2.9. -mut

Ersarissumik suussusilersuineramik nassuiaatini § 2, imm. 6 -imi ersippoq “kalaallit sulisut” paasineqassasut tassaasutut sulineramik inuussutissarsiuteqartut Kalallit Nunaanni inuit allattorsimaffianni nalunaarsorsimasut. Nalorninartut pillugit ilanngussisoqarpoq aalajangersakkamut innersuussinermik § 16 -imut.

2.10. -mut

Oqaaseqarnissamut pissutissaqartitsinngilaq.

2.11. -mut

Oqaaseqarnissamut pissutissaqartitsinngilaq.

3. SIK allappoq:

- 3.1 Tusarniaavigineqartup tamakkiisumik taperserpaa inuit takornariatitsinermi suliffeqartut, aamma nioqquteqartartut takornariatitsinermik ingerlatsivinnut Kalaallit Nunaanni inuit allattorsimaffianni nalunaarsorsimassasut tamakkiisumillu akileraartartuullutik Kalaallit Nunaanni.
- 3.2 Tusarniaavigineqartup tapersersorpai inuit Kalaallit Nunaanni inuit allattorsimaffianni allattorsimangitsut ingerlatsisinnaanginnerat suliaasaqarfimmi akuersissuteqarfiusumi tassani ingerlataareersut assinginik.
- 3.3 Nalilersuineranut ataatsimiititalianik pilersitsinissamut atatillugu tusarniaavigineqartup oqaatigaa pilersitsineq kommunimut immikkut aningaasartuutaassanngitsoq.
- 3.4 Tusarniaavigineqartup taperserpaa puiffissaq akuersissuteqarfiusoq ukiunik 5 -inik sivitsorneqassasoq. Tusarniaavigineqartup aamma taperserpaa akuersissut ukiut 30 - it qaangiunneranni nutaamik neqeroorutigineqartassasoq.
- 3.5 Tusarniaavigineqartup taperserpaa inuit takornariatitsinermik inuussutissarsiutini suliffeqartut inuit allattorsimaffianni nalunaarsorsimanissaat, kiisalu tamakkiisumik Kalaallit Nunaanni akileraartartuunissaat, ernummatigineqarporli inuiaat kalaallit ungasinnerusoq eqqarsaatigalugu takornariatitsinermik ingerlatsinissamut akissaqarnersut, malittarisassatigullu killilersuisoqarnissaa avataaneersut aningaasaliisarnerannut. Tusarniaavigineqartup oqaatigaa nunanit allanit aningaasaliissutit pingaaruteqartut, kalaallit takornariatitsinermik ineriartortitsineranni.

Naalakkersuisoqarfiup sulianut oqartussaasup oqaaseqaatai:

3.1. -imut

Oqaaseqarnissamut pissutissaqartitsinngilaq.

3.2. -mut

Oqaaseqarnissamut pissutissaqartitsinngilaq.

3.3. -mut

Naatsorsuutaanngilaq nalilersuisartunik ataatsimiititalianik pilersitsinerit kommuninut ilassutitut aningaasartuutaanissaat imaluunniit allaffissornerup annertunerulernissaa.

Nalilersuisartunik ataatsimiititanik pilersitsineq tassaaginnarpoq kommunit qitiusumik inissisimanerat akuersissutinik tunniussisarnerni.

3.4. -mut

Oqaaseqarnissamut pissutissaqartitsinngilaq.

3.5 -imut

Pissutissaqartitsisimannngilaq annersunik oqaaseqarnissanut. Taamaattoq takukkit 1.1. -imut oqaaseqaatigineqartut.

4. Nunatsinni Perorsaasut Kattuffiat (NPK) allappoq:

- 4.1 Tusarniaavigineqartoq allappoq isumaqatigineqartoq kommuninik peqataatitsinermi siunertaasoq sulianut ingerlatsinernut atatillugu.
- 4.2 Tusarniaavigineqartup aamma ilalerpaa aalajangersakkamik ilanngussisoqarnera inuit Kalaallit Nunaanni inuit allattorsimaffianni nalunaarsorsimannngitsut akuersissuteqarfiusuni sumiiffinni ingerlatsisinnaannginneri.
- 4.3 Ilanngullugulu aamma tusarniaavigineqartup isumaqatigaa piunasaqaateqartoqarnera piginnaatitsissummik pigisaqartup sumiiffimmut takornariartitsiviusartumut Kalaallit Nunaanni najugaqarnissaa tamakkiisumillu akileraartartuunissaa.

Naalackersuisoqarfiup sulianut oqartussaasup oqaaseqaatai:

4.1. -imut

Oqaaseqarnissamut pissutissaqartitsinngilaq.

4.2 -mut

Oqaaseqarnissamut pissutissaqartitsinngilaq.

4.3. -mut

Oqaaseqarnissamut pissutissaqartitsinngilaq.

5. KNAPK allappoq:

- 5.1 KNAPK siunnersuummut namminermut oqaaseqaatissaqanngilaq, kisiannili siusinnerusukkut allagaasimasut uteqqinneqarput. Allakkani erseqqissarneqarpoq piniartut pisinnaatitaanerat piniarsinnaanermut tammajuitsussarsiniartunik piniartitsiviusartuni, tammajuitsussarsiniartunillu piniartitsisartut pisinnaatitaanngimmata inuussutissarsiutigalugu piniartutut allagartaqarsinnaanermut, takornariartitsineq inuussutigigamikku.

Tusarniaavigineqartup oqaatigaa tammajuitsussarsiniarlutik piniariartartut killeqanngiusartumik piniarsinnaasartut. Tusarniaavigineqartup kissaatitut nalunaarutigaa tammajuitsussarsiniartunik piniariartitsisartut nalunaartassasut qaqugukkut sumiiffiup akuersissuteqarfiusup atornissaanik, ataatsimiittoqartassasorlu tammajuitsussarsiniartitsisartut aamma piniartut akornanni paaseqatigiikkumalluni kiisalu suleqatigiikkumalluni inatsimmi piumasaqaataasut naammassiumallugit.

Naalackersuisoqarfiup sulianut oqartussaasup oqaaseqaatai:

5.1. -imut

Allannguuteqartoqarnissaanut pissutissaqartitsinngilaq. Taamaattoq Naalackersuisoqarfiup maluginiarlugillu nalunaarsorpai tusarniaavigineqartup oqaaseqaatigisai, takornariartitsinermut akuersissutinik ingerlaqqittumik suliaqarnermut atatillugu, sumiiffinni immikkut toqqarneqarsimasuni.

6. Oeqqata Kommunია allappoq:

- 6.1 Tusarniaavigineqartup oqaatigaa pissusissamisoornerussasoq takornariartitsinermut akuersissuteqartarnermi akisussaaffiup tamarmiusup kommuninut nuunneqarnissaa, maannakkutut inatsimmi atuuttumi akisussaaffiup avinneqartarnera qimallugu.
- 6.2 Illuatungiusulli taamaattoq taperserpaa kommunit annerusumik peqataanissaat nalilersuisarnermut ataatsimiititaliakku, kommuninut sulianik ingerlatitseqqissinnaaneq, nalunaarusiortarnernilu kommunit akuunissaat.
- 6.3 Kommuni kissaatigaa annertunerpaamik akisussaaffik kommunimiissasoq pisortat pilersaarusiortarneranni nunamut ammasumut, tunngaviusumik 2011-imi kommuninut nuunneqareersutut. Tusarniaavigineqartup tamatumunnga atatillugu ujartorpaa siunertamut naapertuutissasoq pilersaarusiortarnermut inatsisip aamma takornariartitsinermi akuersissuteqartarnermut inatsisip imminnut naapertuunnerusumik aqqissuussaanissaat.
- 6.4 Tusarniaavigineqartup isumaqatigaa takornariartitsinermut atatillugu inatsisiliat nunatsinni innuttaasunik salliutitsinissaat, makkununnga atasuni:
 - Suliffeqarnermi kalaallit sulisussat salliutinneqarneri,
 - Kalaallinik sulinermik inuussutissarsiteqartunik ilinniartitsineq aamma ilinniaqqittarneq,
 - Namminersorlutik Oqartussat tapiissutaannik immikkoortitsivigineqartarneq
 - Akuersissutinik tunniussisarneq.

- 6.5 Tusarniaavigineqartup taamaattoq tapersersunngilaa malittarisassat § 20, imm. 2 - mi aamma 3 -miittut. (Imaasa ilimanarsisippaat tusarniaavigineqartup isumaa tassaasoq § 20, imm. 1 nr. 2 aamma 3 tusarniaassutigineqartuni. Taanna maanna tassaavoq § 13, imm. 1 nr. 2 aamma 3.) Tusarniaavigineqartup oqaatigaa kommuni aamma Kalaallit Nunaat pisariaqartitsisoq aningaasaliissutinik ilisimasanillu, aningaasaliissutitsigut takornariartitsinermik ineriartortitsinermi atorneqartartunik. Kommunip aamma ernummatigai takornariartitsinermut aningaasaliissutissanit salliutinneqartut aningaasalersuinissanut, soorlu erngup nukinganik iluaquteqarluni nukissiorfiliortitsernerit aamma aatsitassarsiorneq, aningaasaliisartunillu tunuarsimaartitsineruneq kommuninut aamma nunatsinnut.
- 6.6 Sanaartukkanik illuutinillu akuersissutip atorunnaarneratigut paaasarnissamut aalajangersakkamut tusarniaavigineqartoq isumaqarpoq aalajangersagaq isumaqanngitsoq maannamut kommunimi akuersissuteqartarnerit eqqarsaatigalugit. Kommunip erseqqissarpaa aningaasaliisartut annertuunik aningaasalersuutaat sanaartukkanut ingerlaqqissinnaalluartut takornariartitsinermi inuussutissarsiutinik suliffinnillu pilersitsisaramik. Sanaartukkanik piginnittut suli ingerlaqqittumik takornariartitsiniarpata kommunip pissutissaqartinnngilaa sanaartukkat piarneqartarnissaat.

Naalackersuisoqarfiup sulianut oqartussaasup oqaaseqaatai:

6.1. -imut

Oqaaseqarnissamut pissutissaqartitsinnngilaq.

6.2. -mut

Oqaaseqarnissamut pissutissaqartitsinnngilaq.

6.3. -mut

Pilersaarusiornermut inatsimmut attaviusut eqqarsaatigalugit, siunnersuummi § 12, imm. 1 nr. 2 aamma § 15, imm. 2 -mut atatillugu Inatsisartunut inatsimmi malittarisassat inatsimmik atuuttumik aallaaveqarput, aalajangersakkallu assigalugit. Pisinnaatitsinerli atorneqarsimanngilaq. Taamaasilluni immikkoortunut pilersaarummi takornariartitsinermut akuersissuteqarfiusartussanik aalajangersaasoqarsimanngilaq. Tamanna tunuliaqutaralugu Naalackersuisoqarfiup aalajangersakkat arlariit siunnersuummiit peersimavai. Siunnersuummi allannguutit suliaapput qularnaarumallugu pilersaarusiornermut inatsimmut naapertuuttunik aqqissuussisoqarnissaa.

6.4. -mut

Oqaaseqarnissamut pissutissaqartitsinnngilaq.

6.5 -imut

Immikkoortumut 1.1. -imut nassuiaatitut oqaaseqaatit takukkit.

6.6. -imut

Aalajangersagaq ilanngunneqarpoq erseqqissarumallugu piginnaatitsissummik pigisaqartup akuersissutip atorunnaarnerani sanaartukkat illuutillu il.il. qimaannarsinnaanngikkai. Sanaartukkat, illuutit il.il. illuatungiusunut allanut tunniunneqarsinnaappata tamanna tulluarnerusuusaaq. Aalajangersagaq aamma atuarneqartussaavoq isiginiarlugu piginnaatitsissummik pigisaqartut aalajangertarnersut sanaartugassanik, akuersissummut atasunik, taakkualu assigiinngittarneri.

7. Aningaasaqarnermut Akileraartarnermullu Naalackersuisoqarfik allappoq:

- 7.1 Tusarniaavigineqartup oqaatigaa § 21 -imi [maanna § 20 tulliuttullu] oqaasertalersuineq assigiissaagaangitsoq. Qallunaatut inatsisip oqaasertaani atorneqarpoq “afgift”. Inatsimmut nassuiaatitut oqaasertalersuineri atorneqarluni “vederlag”, akileraarutaanngitsoq, kisiannili “afgift”. Tusarniaavigineqartoq isumaqanngilaq ersarinngitsoq pineqarnerisooq akitsuut tunngaviummik inatsimmi § 43 -mi ilaasoq, akiliutaanersooq akuersissummik tunniussaqaarnernut imaluunniit akuersissummut akiliutaanersooq.
- 7.2 Tamatuma saniatigut tusarniaavigineqartup siunnersuummi § 12, imm. 2 [tusarniaavigineqartup isumaa tassa § 12, imm. 1 nr. 2] aamma § 15, imm. 2 [maanna atorunnaartoq] Naalackersuisunik piginnaatitsisoq kommunini pilersaarusiornernut oqartussaassutsimik tigusinissamik, sumiiffiup ilaanut takomariartitsineri akuersissuteqarfiummut. Tusarniaavigineqartup erseqqissarpaa taamatut piginnaatitsissut nassaassaareersoq pilersaarusiornermut inatsimmi § 9-mi. Siunnersuummik taamatut isikkoqartillugu akuersissuteqarneq taamaasilluni nalornilersitsissaaq oqartussaassutsip sumiinneranik aamma aqqissuussinernik nunatsinni oqartussani aamma kommunini pilersaarusiornermut oqartussaassutsit akornanni.

Naalackersuisoqarfiup sulianut oqartussaasup oqaaseqaatai:

7.1 -imut

Siunnersuusiami allannguutini suliaqartoqarpoq. Akitsuusiisarnernut aalajangersakkat maanna oqaasertalersorneqarput §§ -ini 20-22. Allannguinerit suliarineqarput erseqqissarumallugu akitsuutit pineqarnerat.

7.2 -mut

Takukkit siunnersuummut nassuiaatitut oqaasertaliussani 6.3.

8. Erik Lomholt-Bek allappoq:

- 8.1 Tusarniaavigineqartup oqaaseqarfigai siunnersuummi § 1, imm. 2 -mut tunngasut. Tusarniaavigineqartoq isumaqarpoq erseqqissallaqqunartoq pineqartut inissiat, illuutit allat, sanaartukkat, aqqissuussinerit, aqqusernit aamma attaveqaasersuinermit atortut akuersissuummut atasuusut.

Naalackersuisoqarfiup sulianut oqartussaasup oqaaseqaatai:

8.1. -imut

Immikkoortumi pineqartumi ersereerpoq takornarissanut neqeruutigineqarsinnaasuni neqeroornerni, nioqquteqarnerni imaluunniit takornariartitsinernik nioqqutigisanik tunniussisarnerni pisut pineqartut. Tamatumalu saniatigut aalajangersagaq atuarneqartussaavoq inatsisartut inatsisaanni killiliussat isiginiarlugit: Inatsisartut inatsisaanni takornarissanut neqeroortitsisinaanermut akuersissutit pineqarput. Taamaasillunilu aalajangersagaq tunngasuunngilaq ingerlatsinermut atasunut sanaartukkanut.

9. Nomad Greenland allappoq:

- 9.1 Tusarniaavigineqartup oqaatigaa siunnersuut kinguneqarsinnaasoq annertuunik unammilligassaqalernernik nunanit allaneersunik aningaasalersuisussanut atatillugu, pingaarluinnartuusunut ineriartortitsinissami Kalaallit Nunaanni takornariartitsinikkut suliniutinik. Tusarniaavigineqartup oqaatigaa pisumi aalajangersimasumi ernummateqarneq Kalaallit Nunaat ikittuinnarnik aningaaseriveqarmat, tamannalu nammineq unammillernissamik killiliisuummat, attartornissamut aningaasanik atugassarititaasut naammaginartut iluanni, taamalu maani najugaqartut suliffeqarfiit aningaasaliisussarsiniartarnerannut. Ilanngullugulu erseqqissarneqarpoq aningaasanik attartornissamut atugassarititaasut, soorlu ernit qaffasissut, inuttut nammineq qularnaveeqqusiinissamut piumasaqaatit, aningaasaliisartullu amerlasuut kissaatiginnngimmassuk nipangiinnarluni peqataanissat taamaallaat 33 % -inik piginneqataassuteqarnikkut, ingerlatsinermut malunnaatilimmik sunniuteqarani. Tusarniaavigineqartup oqaatigaa tamatuma annikillissikkai aningaasalersuisussanik naammattunik pissarsiniarsinnaanerit.

Tusarniaavigineqartup oqaatigaa aningaasaliissutissanut naammattunik periarfissaqarani najukkani suliffeqarfiit takornariartitsinikkut akikitsunik nioqqutinik neqerooruteqarsinnaassusiat taamaallaat atuuttassasoq annikitsuinnarnik aningaasaliiffiusinnaasuni nioqqutissani. Erseqqissarneqarpoq tamanna neqeroorutinik akikitsunik amerlasuunik kinguneqarsinnaasoq, aningaasaatikitsunik takornariartartunik nutsuisunik, naleqarluartunik

takornariartartunik nutsuinerunani. Kiisalu tamanna ataatsimut takornariartartuniit aningaasarsiorsinnaanermik isaatitsisinnaanermillu annikinnerulersitsissaaq, piujuaannartitsisumillu ineriartortitsinermut pitsaasunillu akisuunik nioqquteqarnermik aallussinnaanermik akornusiilluni.

Tusarniaavigineqartup eqqaavai sakkut aaqqissuussinerit soorlu taaneqartartut “Offentlige-Private Partnerskaber” aamma nunanit tamalaanit aningaasalersuisarnerit ingerlatsivissuit nunarsuarmit aningaasaateqarfissuatut Verdensbanken aamma Den Europæiske Investeringsbank (EIB), kisiannili maanna malittarisassat suli killilersuisuusut eqaatsumik sukkasuumillu iliuseqarsinnaanernut nunanit allaniit naammassisaqarfiusunik aningaasalersuisinnaanernut.

- 9.2 Timmisartut mittarfissaannut nutaanut aningaasalersuutitut tunngatillugu tusarniaavigineqartup oqaatigaa aalajangiisuusoq qularnaassallugu ataaqatigiissaagaasunik tikeraat tikittarfiinik aaqqissuussisoqarnissaa. Tusarniaavigineqartup tigussaasunik siunnersuutigai qanoq aningaasalersuisoqarsinnaanerata ilalersorneqarsinnaanera takornariartitsinermut periusissiakkut:
- Unnuisarfinnik pisariaqartitsineq: nunani allani aningaasaliisartut najukkani suliffeqarfinnik suleqateqarsinnaapput sanaartornerni ingerlatsinernilu akunnittarfinnik aamma unnuisarfinnik qaffasissunik pitsaassusilinnik, tamannalu takornariartartunik qaffasissunik akiliuteqartartunik nutsuinerussaaq.
 - Attaveqaasersuusersuinermit tapersiissutit: sanaartoriaatsinik qorsuusunik taaneqartartunik atortuulersitsiartuaarneq aamma avatangiisunut inussiarnersunik atortussanik atuineq, nunani tamalaani aningaasalersuisartut piujuaannartitsinermik misilittagaqartunik ilisarititsisoqarsinnaavoq.
 - Piginnaasanik ineriartortitsisarneq: sungiusartitsisarnerit aaqqissuussinernik atortuulersitsisarneq nunani tamalaani takornariartitsinermik ingerlatsivissuit namminersortut suleqatigalugit, najukkani sulisussat pikkorissarumallugit tikeraanik pitsaasumik tikilluaqquisumillu sullissinermi, angallassisarnermi aamma allaffissornermi.
 - Immikkut ilisimasat aamma misilittakkat: Iluaqutigissallugit nunani allani aaqqiissutaasarsimasut naammassisaqarfiulluartartut, nunani tamalaani misilittakkat atorlugit sukkasuumik aningaasaliissutit takornariartitsisarnermilu atortulersuutit aningaasaliiffiusartut iluanaarutissartaat “pukunneqartarsinnaapput”.

Tusarniaavigineqartup eqqaavai tigussaasunik misilittakkat uanngaaneersut:

- Bhutan: periusissiaq uunga "high value, low volume", siunnerfeqartoq qaffasissunik akiliuteqartartut takornariartartut "nutsunnissaannut", ullukkaartumik piujuaannartitsinermut akitsuummik akiliuteqartitsisarnikkut. Periusissiap siuliani pineqartup nuna Bhutan tassaalersissimavaa takornariartarfik ikittuinnarnut sammisoq - akimasooq ornittagaq, neqerooruteqartoq misigisassanik imaannaanngitsunik aamma aningaasatigut iluaqutissartalinnik, inuiaqatigiinnut siammasissumik iluaqutaasunik.
- Kina: sukannersut piginnittuunermut killilersuutit atuuttut kingunerisimavaat nunanit allaniit aningaasaliisarnerup (FDI) ingerlatsivinni assigiinngitsuni annikinnerulernera, aningaasaliisartut amerlasuutigut qinerajummassuk killilersuivallaanngitsunik malittarisassa qarfiusut, aningaasaliissutiminnik pitsaaneruseqarfiusut, aningaasaliissutiminnik pitsaaneruseqarfiusut. Killilersuutit akornutaasimapput Kina -p periarfissaanut teknologiimik ineriartortumik iluaquteqarsinnaassusianut pissarsiniartarneranut aningaasalersuinerullu, aningaasarsiornerup qaffakkiartorneranik attassiinnarfiusooq.
- India: killilersuutaasimasut ingerlatseqatigiiffinnut nunanit allaneersunut niuertarfeqarnermi kingunerisimavaat aningaasarsiornerup ineriartornerata sukkaannerulernera aningaasaliisartullu killeqalernerat. Aatsaat maleruagassanik sukaterinerit sakkukillineqarmata Indiami malugineqalerpoq nunanit allaniit aningaasaliiumasut annertusiartornerat, tamannalu aningaasarsiornerup siumukalerneranik kinguneqarluni, niuertarfeqarnikkullu ineriartortitsinermik.
- Singapore: aningaasaliisinnassutsip ammaannartup soqutiginnilersillugit qaaqusutut issimavai nunanit allaniit aningaasaliiumasut, tamannalu nammineq nunami tassani aningaasarsiornerup iluatsitsilluni siuariartorneq kinguneraa. Singapore-mi eqaatsimik killilersuinngitsumillu politikkeqarneq nunanit allaniit aningaasaliiniartunut kinguneqarpoq qaffasinneruseqarfiusut, aningaasarsiornermik siuariartortitsisumik, ineriartortitsisumik, ineriartortitsisumik aammalu ineriartortitsisumik.

9.3 Tusarniaavigineqartup eqikkaaneraa tamanna tunuliaqutaralugu siunertaasoq maani nunatsinni najugallit soqutigisaasa illersornissaat aamma piujuaannartitsisumik ineriartortitsineq oqimaaqatigiissinneqassasut nunanit allaniit aningaasaliissussanik pisariaqartitsinermut, aningaasanik pisariaqartunik periarfissaqalersillugu Kalaallit Nunaanni immikkut ilisimasalinnik suleqatissaqalersillugu. Piginnittuunernik aaqjissuussinernik eqaatsunik atortuulersitsisarnertigut ilanngullugit aningaasalersuisussatut periarfissat allat, taava Kalaallit Nunaat pilersitsisinnaavoq takornariartitsinermik inuussutissarsiummik ineriartortitsisumik piujuaannartitsinermillu tunngavilimmik, najukkanut namminernut aamma nunanit allanit ingerlatseqataasunut iluaqutaasussanik.

Naalakkersuisoqarfiup sulianut oqartussaasup oqaaseqaatai:

9.1. - imut

Takukkit nassuiaatitut oqaaseqaatit 1.1. -imut

9.2. -mut

Tunnavigerpiarlugu ataqatigiissaagaasumik ineriartortitsineq Naalakkersuisut aallartissimavaat takornariartitsinermi immikkoortumut pilersaarut. Naalakkersuisut akueraat pisariaqarmat peqatigiilluni suliniuteqarnissarput, suliassaqarfinni arlaqartuni, tassani inerititaqariartorneq iluatsikkumallugu.

9.3. -mut

Takukkit 1.1. -imut nassuiaatitut oqaaseqaatit.

10. Kommuneqarfik Sermersuumi Inuussutissarsiornermut immikkoortortaqarfik allappoq:

- 10.1 Tusarniaavigineqartoq oqaaseqarpoq iluarisimaarnartoq kommunit peqataatinneqarnerat annertunerusumik akuersissuteqartarnermi suliat ingerlanneqartarneranni. Taamaattoq tusarniaavigineqartup oqaatigaa inartisartut inatsisaanni aamma killiliussat assut ersernerluttut, paragrafit amerlasuut oqartussaaffimmik Naalakkersuisunut tunniussisuummata imaluunniit oqartussanut suliassanut isumaginnittussanut nammineq aalajangiisussaatsisoqarmat siunissami inatsisartut inatsisaannik killiliussassanik, maannamut ersarissaavigineqanngitsunik.
- 10.2 Tusarniaavigineqartup tikkuarpaa allaffissornerujussuarmik pilersitsisoqassamat akuersissummik tunniussaqaarnissamut. Tusarniaavigineqartup inassutigaa nalilersuisoqarnissaa qularnaarisoqarnissaalu suliat ingerlanneqarnissaannut nukissanik immikkoortitsisoqarsimanissaa.
- 10.3 § 2, imm. 5 aamma 6 -imut [maanna § 2, imm. 6 aamma 7], tusarniaavigineqartup apeqqutigaa suna assigiinngissutaanersoq najugaqavissumut aamma inuit allattorsimaffianniinnermut.
- 10.4 § 3, imm. 1 -imut [maanna allatut oqaasertalerneqarsimavoq, takuneqarsinnaallunilu § 2, imm. 2-mi], atatillugu tusarniaavigineqartup apeqqutigaa allequtaallutik nioqquteqartartut kiffartuussinernik akuersissuteqarfiusumik piareersaanermi ingerlatsisartut aamma akuersissummi piumasqaatinik naammassinnittussaanersut, matumani aamma najugaqartuunissamut, tamannalu isumaqarnerseq nunanit allaniit

illussanik titartaasartumik atuisoqarsinnaanngitsoq, illuaqqanik / akunnittarfimmik ineriartortitsinermut.

- 10.5 § 4, imm. 5 -imut [maanna§ 3, imm. 2-mut ilanngunneqarnikoq], tunngatillugu tusarniaavigineqartup apeqqutigaa eqqortumik paasinninnerunersoq ingerlatsisut assigiinngitsut arlariit sumiiffimmut ataatsimut akuersissuteqarfigineqarsinnaasut assigiinngitsunik ingerlatsisussatut, assersuutigalugu eqalunniartarnermik aamma sisorartitsisarnermik.
- 10.6 § 11 -imut [maanna§ 4, imm. 5]atitillugu tusarniaavigineqartup apeqqutigaa kommuni piginnaatitaasinnaanersoq nalilersuisarnermut ataatsimiititamik pilersitsinngikkaluarluni § 5 [maanna § 7] naapertorlugu.
- 10.7 § 12 -imut atitillugu tusarniaavigineqartup oqaatigaa pissusissamisuunngitsoq akuersissummik tunniussisoqarsinnaanera immikkoortumut pilersaarummut atasumik, pilersaarusiernerup sinneranut kommuni akulerunnagu.
- 10.8 Tusarniaavigineqartup oqaatigaa ingasattajaarnerusutut isikkoqarmat malittarisassiortoqarsinnaanera piginnaatitsissummik pigisaqartup najukkameersunik sulisussanik nioqquteqartartunillu sulisitsisarnissaanut, ersarinnerusunik suussusilersueqqaarani malittarisassat sunik imaqaarnissaannik, imaluunniit qaqugukkut malittarisassiortoqartassanersoq aalajangersaqaarnagu.
- 10.9 § 20 -imut tunngatillugu [maanna § 13] tusarniaavigineqartup oqaatigaa pissusissamisuussasoq takornariartitsinermut inatsit malissallugu, akuerineqartariaqartorlu 49 % angullugu piginnittuuneq inuit allattorsimaffianni allassimanissamik akileraartartuunissamillu piumasaqaatinik naammassinninngitsut.
- 10.10 § 22 -imut tunngatillugu [maanna § 23] pisortani sulianik ingerlatsinermut aningaasartuutit pillugit, tusarniaavigineqartup oqaatigaa allannguisoqartariaqartoq takornariartitsinernut inatsimmut naapertuuttumik.
- 10.11 Tusarniaavigineqartup oqaatigaa paatsuungasoqartoq kommuninut pisinnaatitsinermik tunniussisoqarneranik akuersissummumut nakkutilliinermullu atitillugu. Tusarniaavigineqartup apeqqutigaa siunnersuummi tamatuminnga tunngavilimmik allannguisoqarnersoq.
- 10.12 Ilanngullugulu tusarniaavigineqartup oqaatigaa takornarissanut neqeroorteqarsinnaanermut akuersissuteqarneq pillugu inatsisartut inatsisaat,

takornarialerisut ass. pillugit inatsisartut inatsisaata imminnut attuumassusaat nalorninartillugu.

10.13 Tusarniaanermut akissummi tusarniaavigineqartup ilanngussimavai oqaaseqaatit Sanaartornermut Avatangiisinullu Ingerlatsivimmeersut, imaattunik oqaaseqaateqartut:

- A. Ingerlatsiviup kissaatigaa erseqqissaat, ingerlatsinerit suut akuersissuteqarfiusinnaanerinit, kiisalu erseqqissaat nakkutilliinissamut pisussaaffimmut, tak. § 4, imm. 4 [maanna siunnersuummi peerneqarnikoq]. Aalajangersagaq paasineqassanerluni qaqqanut portunernut qaqqasiortoqassappat, taava maani najugallit tamaani qaqqasiorsinnaanngitsut ilaqtuttat Danmark-imeersut peqatigalugit?
- B. Tusarniaavigineqartup kissaatigaa erseqqissaasoqarnissaa § 12, imm. 2 -mut [maanna siunnersuummi peerneqarnikoq], taamaappat immikkoortumut pilersaarut nunaminertamik atuinnermut inatsisaalissammat qaffasineq. Ingerlatsiviup inassutigaa immikkoortumut pilersaarummi takornariartitsisarnermut akuersissuteqarfiusunik toqqaasoqassanngitsaq.

Naalackersuisoqarfiup sulianut oqartussaasup oqaaseqaatai:

10.1. -imut

Anguniarneqarsimavoq erseqqissaanissaq suliassat qanoq agguataarneqarnerannik aalajangersakkamut atasumik pilersaarusiornermut inatsimmut atasuni, siunnersuummi § 12, imm. 1, nr. 3 aamma § 15, siunnersuummut peerneqarput.

10.2. -mut

Naalackersuisoqarfiup aaqqissuussineq nalilersuiviginiarpaa.

10.3. -mut

Erseqqissarneqarpoq pineqarmata suliffeqarfiit Kalaallit Nunaanni angerlarsimaffeqartut. Kalaallit Nunaanni angerlarsimaffeqarnermi innersuunneqarpoq CVR -imut nalunaarsuiffimmi nalunaarsorsimaneq.

10.4. -mut

Akuersissummik tunniussinissamut atatillugu neqeroortitsinermi nunaminertamik toqqaasoqartarpoq neqeroortitsissutaasussamik. Neqeroortitsinerup siunertaraa qularnaassallugu ammasumik naapertuilluartumillu ingerlatsisoqarnissaa, kingornagut akuersissummik tunniussiviusussamik periarfissaasut akornanni

naleqqunnerpaatinneqartumut, atugassarititaasut allaaserineqartut tunngavigalugit. Toqqaasarnermi atugassarititaasut aamma taakkua qanoq oqimaalutarneqarneri neqeroortitsissutaasuni ersissapput. Toqqaasarnermi atugassarititaasut § 10 -mi ersipput. § 10, imm. 1, nr. 3 naapertorlugit pingaaruteqarpoq qanoq annertutigisumik qinnuteqartup kalaallinik sulisussanik aamma kalaallinik nioqqutissanik nioqquteqartartunik atuinera, akuersissut naapertorlugu ingerlatsinerni.

Aallaavittulli taamaattoq akornutissaqanngilaq illussanik titartaasartunik nunanit allaneersunik atuisarneq suliniummik titartaasitsinermi.

10.5. -imut

§ 4, imm. 5 [maanna § 3 imm.2-mut ilanngunneqarnikoq] paasineqassaaq ingerlatsinerit allat sumiiffimmi pineqartumi ingerlanneqarsinnaanerattut, tamanna akuersissummut pineqartumut unammillertuunngippat. Tunngaviusumik periarfissaasinnaavoq akuersissutit arlariit piffissanut ukiup ingerlanerani aalajangersimaqqissaartunut tunngasut tunngasinnaaneri taamalu ataatsikkut ingerlatsisoqartarani. Tunngaviusumik maannamut neqeroortitsisoqarnikuunngilaq akuersissuteqarnissanik allanik sumiiffimmi ataatsimi, kisianni taamaallaat ingerlatsinerit piffissani aalajangersimasuni immikkoortuni ingerlatsiviusartuni. Taamaattoq oqaatigineqartarpoq kissaateqarneq akuersissummik pigisaqartut ingerlatsinernik amerlanerusunik akuerineqarsinnaasariaqartut, assersuutigalugu illuaqqat pilersinneqareersimasut iluaqutigilluarumallugit.

10.6. -imut

Siunnerfiunngilaq pisinnaatitsinerup kommuninut ingerlateqqinneqarsinnaanissaa, nalilersuinermut ataatsimiititaliaqanngippat. Kommuninut suliasanik ingerlatitseqqinnermi nalilersuinermut ataatsimiititaliap qularnaartarpaa suleqatigisat naleqquttut akulerunneqartarneri, assersuutigalugu pisassat nalilersortarnerini aamma piniarsinnaassutsip annertussusiata nalilersortarnerani.

10.7. -imut

Aalajangersagaq siunnersuummut peerneqarpoq.

10.8. -mut

Siunnersuut imaqarpoq pisinnaatitsinermik malittarisassiorsinnaanernut najukkani sulisussanik atuisarneq aamma najukkani nioqquteqartartunik atuisarneq pillugit. Naalakkersuisut maanna aalajangersimasunik pilersaaruteqanngillat pisinnaatitsissummik atuinissamut, kisianni inatsisartut inatsisaat siunissamut isumannaallisarlugu ikkutaalluni. Naalakkersuisut isumaat naapertorlugu pisinnaatitsissut sakkussaavoq naleqquttoq Kalaallit Nunaanni takornariartitsinermik ineriartortitsinermi, matumanissaaq suliffissat qanoq ittut

pilersinneqarnissaannik kissaateqarneq inuussutissarsiutini, aamma suliffeqarfinni pineqartuni qanoq ittunik piginnaasaqartoqarnissaa. Isumaliutaanngilaq pisinnaatitsissutip atorneqarnissaa suliffeqarfinnut piumasaqaasersuinertut naammassineqarsinnaanngitsunik.

10.9. -mut

Tusarniaanermit akissuteqaatit Naalakkersuisunit tusaatissatut tiguneqarput, taakkualu aallaavigalugit aalajangersakkat naleqqussarneqarsimapput, maannakkullu aktiaatileqatigiiffimmi piginneqatigiiffimiluunniit aningaasaatinik piginnittut 2/3 Kalaallit Nunaanni najugaqartariaarutsillugit, maanna piginnittuusut "affai sinnerlugit" Kalaallit Nunaanni najugaqartariaqalerput.

10.10. -mut

Aalajangersagaq iluarsiiuserneqarpoq, pisinnaatitsisoqalerluni malittarisassiorsinnaanermut akitsuummik akiliuteqartitsisarnermut pisortat sulianik ingerlatsisarnerinut allatigullu pisortat ingerlatsinerinut.

10.11. -imut

Erseqqissarniarneqarsimavoq oqartussaassutsip agguarneqarnera Naalakkersuisut aamma kommunit akornanni aalajangersakkakut, sumiiffinnik immikkoortumut pilersaarummi toqqaasarnikkut, siusinnerusukkullu § 15 -iusoq siunnersuummit peerneqarluni. Suliniut akuersissuteqarfiusartunik toqqaasarneq suli kommunit oqartussaaffigaat, tak. pilersaarusiormut inatsit. Kommunip kissaatiginngippagu kommunip susasaqarfiani akuersissuteqarfiusartussanik immikkoortunik nunaminertaqartarnissaa kommunimi akuersissutinik tunniussisoqarnaviannngilaq.

10.12. -mut

Takornarissanut neqerooruteqarsinnaaneq, sumiiffinni nunami aalajangersimasuni inatsimmi pineqarput kisermaassilluni ingerlatsinernik aalajangersimasunik ingerlatsinernik neqeroorsinnaaneq, takornarissanut neqerooruteqarsinnaaneq il.il. inatsisartut inatsisissaattut siunnersuut imaqarpoq takornariartitsinermik inuussutissarsiummi killiliussat sinnerinik.

10.13 -imut

A) Aap, aalajangersagaq aallaavigalugu inuit Kalaallit Nunaata avataani najugaqartutut nalunaarsorsimasut, sumiiffimmi akuersissuteqarfiusussaasumi ingerlanneqarsinnaasutut akuersissutaasut assinganik ingerlatseqqusaanngillat.

B) Immikkoortunut pilersaarut pillugu aalajangersakkat siunnersuummut ilanngunneqarput.

11. Lings Hunting Greenland ApS allappoq:

- 11.1 Tusarniaavigineqartup ilassilluarpai suliniutit nutaat, pingaartikkamikku akuersissutit ingerlanneqassasut ineriartortinneqarlutillu maani najugalinnit misilittagalinnit, sumiiffinnillu ilisimasaqartunit. Taakkua isumaqarput piviusorsiornerusoq akuersissummik ingerlatsisinnaaneq, toqqaannartumik avataaneersunit aningaasalersorneqarani, - nalorninaatit aporfiusinnaasullu iliuseqarfiginissaannut piareersimagaanni, ilungersorlunilu suliumagaanni anguniagassatut aalajangiussat angujumallugit.
- 11.2 Nalilersuisarnermut ataatsimiititaliamut tunngatillugu tusarniaavigineqartup kissaatiginartippaa ataatsimiititaliap aalajangiinissamini tamarmiusunik inuttaqartarnissaa, aalajangiinerit toqqissisimanaqqullugit.
- 11.3 Tusarniaavigineqartup ernummataasa annersaraat 2025-imi ingerlatsinissamut taamaallaat Kangerlussuarmiit sap. akunneranut pingasunik timmisartoqartarnissaa, Sisimiullu avineqartartussanik. Neriutigaat aaqiissutissarsisoqarumaartoq pisariaqartitsineq takornariarnermik inuussutissarsiortuniittoq allaniittorlu naammassineqarsinnaaqqullugu.

Naalackersuisoqarfiup sulianut oqartussaasup oqaaseqaatai:

11.1. -imut

Oqaaseqarnissamut pissutissaqartitsinngilaq.

11.2. -mut

Siunnersuut Naalackersusiunit nalimmassarneqarsimavoq, maannakkullu nalilersuinermit ataatsimiititaliamik pilersitsisoqarsinnaanera aalajangersarneqarsinnaalerluni. Tassunga atatillugu Naalackersuisut nalilersuinermit ataatsimiititaliap inuttaasa tamarmiusarnissaannut tunngatillugu aalajangersaajumaarput, taamaakkaluartoq eqqumaffigineqassaaq inassuseqaasiornissami piginnaasat siammasissut pilersinniarneqarnissaat.

11.3. -mut

Oqaaseqaat malugineqarpoq. Naalackersuisut malersoqqissavaat ajornartorsiut pineqartoq immikkoortumut pilersaarummut takornariartitsinermut atasumut tunngatillugu.

Imikkoortumut pilersaarummi siunertaavoq qularnaassallugit suleqatigiinneq takornariartitsinermik inuussutissarsiummiittut suliasaqarfiit assigiinngitsut akimorlugit aaqqissuussaasumik.

12. Avannaata Kommunia allappoq:

- 12.1 Kommunalbestyrelse-p inatsisissamut siunnersuut pitsaasutut isiginngilaa, taamaattumillu inassutigineqarpoq taanna Avannaata Kommuniani atortinneqassanngitsoq.
- 12.2 Kommunalbestyrelsip erseqqissarpaa takornariartitsisartut suliassaqarfinnut assigiinngitsunut atatillugu kisermaassillutik ingerlatsisutut pissusilersortalersut, naak taamaangikkaluartoq atuisut misigisarpaat nunaminertanik atuisinnaaneq tamanut atuuttoq unioqqutinneqartartoq. Kommunalbestyrelsip ernummatigaa tamanna peqqumaatissanik katersisarnermut periarfissanut sunniuteqarsinnaanera, pinngortitamilu toqqissisimasumik pisuttuarsinnaanermut aamma.
- 12.3 Kommunalbestyrelsip oqaatigaa aalajangersaasarnerit nunap immikkoortuini kommuninit aqunneqartumik pisariaqartut, qitiusumi pinnatik, kommunimi najugallit sumiiffiit ilisarismammatigit.

Naalackersuisoqarfiup sulianut oqartussaasup oqaaseqaatai:

12.1. -imut

Suliniut sumiiffinnik akuersissuteqarfiussanik toqqaasarnernik imaqartoq kommuniniippoq. Kommunip kissaatiginngippagu akuersissuteqarfiussanik kommunimi peqarnissaa tamanna pinaviangilaq.

12.2. -imut

Oqaatigineqartut nalunaarneqarput. Siunnersuutip peqqumaatissanik katersisinnaaneq sunnernaaviangilaa, najugaqavissullu pinngortitami angalaarsinnaanerat.

12.3. -mut

Sumiiffinnik toqqaasarneq kommunit suliniuteqarnerisigut pisarpoq, taakkua sumiiffinni pissutsinik isumaginnittuummata.

13. Kommune Kujalleq allappoq:

- 13.1 Tusarniaavigineqartoq nalilersuinermit ataatsimiititaliorsinnaanermut oqaaseqaateqanngilaq. Tusarniaavigineqartup oqaatigaa killiliussat ersarinnerusut sumiiffinnik toqqaasarnissanut ajornanginnerulersissagaat allaffissornikkut aqutsineq suliassaqarfimmi, takornariartitsinermik suliffinnut pinngortitallu innarlerneqanngitsup ilisarnaataasigut.
- 13.2 Taamaattoq kommunip oqaatigaa takornariartitsinermik ingerlatsineq nunat tamalaat akornanni suleqatigiinnermik tunngaveqarmat, tamannalu inatsisartut inatsisaanni tunngaviusuni ersittariaqartoq. Tusarniaavigineqartup ujarorpai

aaqqiissutissat nunanit tamalaanit aningaasalersuisarnermi tunngaviusut. Erseqqissaatigaalu aaqqiissutissat pineqartut ilaatigut sunniuteqartarmata pitsaasunik naammassisaqarfiusunillu unnuisarfeqarnermut neriniartarfeqarnermullu. Aningaasaliisarnernik aaqqiissuussinerit nunani tamalaani aningaasaliisartunik nalornisitsisariaqanngillat, taakkua sulisarmata najukkani kisarsimaarlutik ingerlatsinermi sulisoqarnermilu.

Naalackersuisoqarfiup sulianut oqartussaasup oqaaseqaatai:

13.1. -imut

Oqaaseqaateqarnissamut pissutissaqartitsinngilaq.

13.2. -mut

Takuuk 1.1. -imut oqaaseqaatigineqartut.

14. Arctic Circle Business allappoq:

- 14.1 Tusarniaavigineqartup oqaatigaa pisariaqartitsisoqartoq najukkani inoqarfinni pikkorissartitsisarnissanik, takornariatitsinermik akuersissuteqarfiusuni sulisinnaanngorlugit.
- 14.2 § 2, imm. 1 -imut atatillugu tusarniaavigineqartup oqaatigaa sumiiffinni najugallit illoqarfinnut allanut aallartartut niuerniarlutik, tamannalu aamma takornariarnerusartoq. Tusarniaavigineqartullu apeqqutigaa sooq tamanna takornariatitsinermut inatsimmi aamma atuutinnginnersoq, aamma tusarniaassutigineqartumi.
- 14.3 § 2, imm. 3 -mut atatillugu tusarniaavigineqartup apeqqutigaa taaguut ”professionel”, aamma atuutinnginnersoq amatørinut akilerneqarlutik ingerlatsisartunut.
- 14.4 § 4, imm. 4 -mut [maanna siunnersuummit peerneqarsimasoq], atatillugu tusarniaavigineqartup tapersorsorpaa inunnut nunatsinni inuit allattorsimaffiani allassimangitsunut inerteqqutaalissasoq akuersissuteqarfiusup iluani ingerlatsisinnaaneq, assigisaanik suliaqarluni, akuersissummiittunik. Tusarniaavigineqartup ujartorpaa taamaattoq inuussutissarsiutini allani taamatulli illersuineramik pilersitsisoqartariaqartoq.
- 14.5 Aalajangersakkamut Naalackersuisut aalajangiisinnaasut nalilersuisarnermut ataatsimiititaliami ilaasortat arlaannaannulluunniit atasuunnginnissaannik

eqquutitsisoqarnersoq tusarniaavigineqartup oqaatigaa kommunit aamma Naalakkersuisut toqqagaannut taamaaliorinnaasariaqartut.

- 14.6 Tusarniaavigineqartup apeqquutigaa akuersissummik pigisaqartup kissaatigisimappagu allanik aamma ingerlatsisinnaaneq sumiiffimmi akuersissuteqarfiusumi, akuersissummik pigisaqartup ingerlatsinini annertusisinnaanera pineqartut akuersissummut ilanngunneqarnerisigut.
- 14.7 Aalajangersakkamut Naalakkersuisut aalajangersagaliorsinnaasut piginnaatitsissummik pigisaqartup pisussaaffianik kalaallinik sulisussanik atorfinitsitsisarnissamik suliassani aalajangersimasuni ingerlatsinerniluunniit, tusarniaavigineqartup oqaatigaa ingasattajaarnerusoq Namminersorlutik Oqartussat aalajangersinnaassappassuk kikkut sulisorineqarnissaat. Tusarniaavigineqartup oqaatigaa taamaattoqassappat tamanna immikkut inatsisitut aaqjissuuttariaqassasoq, inuussutissarsiortunut ataatsimut atortuusutut, takornariartsitsinermuinnaanngitsoq. Tusarniaavigineqartup erseqqissarpaa ingammik takornariartsinermi iluaqutissartaqartartoq avataaneersunik sulisoqartarneq, pisariaqarsinnaasarmat misilittagaqarneq ilisimasaqarnerlu, Kalaallit Nunaanni pigineqanngitsunik.
- 14.8 Tusarniaavigineqartup oqaatigaa aalajangersagaq takornariartsinermik inuussutissarsiortut pisussaaffeqarnissaannik kalaallinik nioqquteqartartunik atuinissamik unammilleqatigiinnermik innarliisinnaasoq, inuussutissarsiut pineqartoq ataasiinnaq taamaallaat kalaallinik nioqquteqartartoqarpat. Tamatumani kingunerisinnaavaa kalaallip nioqquteqartup akiusut annertusisinnaagai piumasamik.
- 14.9 Taaguummot ”pigisaminut nalilinnut tamakkiisumik oqartussaalluni atuisinnaavoq”, jf. § 19, imm. 1 nr. 4 [maanna § 12, imm. 1, nr. 3], tusarniaavigineqartoq aperivoq tamakkiisumik oqartussaassuseqarnerunersoq aningaaserivimmit, aningaasaateqarfimmit imaluunniit aningaasaliisartunit attartussagaanni. Tusarniaavigineqartup apeqquutigaa taaguut paasineqassanersoq aningaasanik tigorianaannik naammattunik peqarnertut, tamannami suliffeqarfimmut pitsaanerpaajunavianningimat.
- 14.10 Tusarniaavigineqartup oqaatigaa § 20 -imi § 20 [maanna § 13] aningaasaateqarnissamik piumasagaat unammilligassaqartitsisoq suliniutinut annertunernut, avaqqunneqarsinnaanngikkaangat nunanit allaneersunit aningaasaliisoqarnissaq misilittakkatigullu ikiorneqarnissaq.

- 14.11 Tusarniaavigineqartup oqaatigaa nalorninaateqartoq kaaviiartitanut akitsuusiinissamik aalajangersaaneq, tak. § 21, imm. 1 nr. 2 [maanna § 20 tulliilu]. Tusarniaavigineqartup malugeqquaa kaaviiartitat annertuut isumaqanngimmata suliffeqarfiup sinneqartooteqarneranik, taamalu amigartoortoqarsinnaammat ingerlatseqatigiiffiullu ingerlaannarsinnaanera nalorninartorsiortinneqarluni.
- 14.12 Ingerlatsinissanut pilersaarutit akuerineqartussaanerannut, tak. § 24 imm. 2 [maanna § 17, imm. 2], tusarniaavigineqartup malugeqquaa Naalakkersuisut suliamik ingerlatsinerat eqqaaneqarluarsinnaasoq.
- 14.13 Nalunaarusiortarneq § 25 naapertorlugu pillugu [maanna § 18], tusarniaavigineqartup oqaatigaa pitsaasumik pissutissaqartariaqartoq akuersissummik pigisaqartup qaammatit pingasukkaarlugit nalunaarusiortarnissanut, tamanna suliffeqarfinni nukinnik atuinartuummat. Akuersissuteqarfiusunut angisuunut tunngatillugu annerusumik aqutsisoqarnissaa pisariaqartinneqarpat tusarniaavigineqartup pisariaqartippaa tamatuma nalunaarsorneqarnissaa ilanngullugu.
- 14.14 § 26 -imut [maanna § 19], tusarniaavigineqartup oqaatigaa tamanna tunngaviummik unammilleqatigiinnermut inatsimmik unioqqutitsinerusinnaasoq. Tusarniaavigineqartup apeqquuserpaa sooq Namminersorlutik Oqartussat suliassanik ingerlatsinermut akulerunneqarnissaat. Tusarniaavigineqartup ilassutigaa allanneqartariaqartoq paasissutissat Namminersorlutik Oqartussat suliffeqarfiutaannut inuussutissarsiortunik akuersissuteqarfiusunut sullitaqartunut agguanneqartassanngitsut.
- 14.15 Sanaartukkanik paaasarneq pillugu, tak. § 27 [maanna § 26], tusarniaavigineqartup nalunaarppaa aalajangersagaq siumoortumik ilisimatitsereernissamik imaqaanngitsoq. Tusarniaavigineqartup eqqaavaa tamanna siumoortumik piffissaqartitsilluarluni nalunaarutigineqartartussaasoq, illuutillu taamaallaat piarneqartassasut allamut tunineqarsinnaanngikkunik.

Naalakkersuisoqarfiup sulianut oqartussaasup oqaaseqaatai:

14.1. -imut

Naalakkersuisut isumaqatigaat piumasaasoq ataatsimut suliassaqarfiit akimorlugit suliniuteqarneq takornariartitsineq ineriartortinneqassappat. Tamanna tunuliaqutaavoq sooq Naalakkersuisut immikkoortumut pilersaarummik suliagarnerannut, suliassaqarfik ineriartortitsiviussammat.

14.2. -mut

Naalackersuisut tusarniaasup akissuteqaataat maluginiarpaat, taamaakkaluartoq siunnersuutip uuma suliarineqarnissaa eqqarsaatigalugu siunnersuutit allat pillugit oqaaseqarusunngillat.

14.3. -mut

Siunnersuummi pineqarpoq kisermaassilluni ingerlatsinissamut akuersissummik tunniussisarneq sumiiffinni aalajangersimasuni ingerlatsinnaanermut. Taamaasilluni ersarissumik inuussutissarsiutigalugu ingerlatsinissamut tassunga ilanngullugu takornarissanut neqeroorut pineqartoq pillugu akiliutinik tigusineq. Ingerlatsisut proffessioneliunngitsut aalajangersakkami matumani ilaatinneqanngillat. Ilisimatitsissutigineqassaaq oqaaseq “professioneliusoq” oqaatsit eqqarsaatigalugit allatanit peerneqarsimmmat.

14.4. -amut

Tusarniaavigineqartut akornanni assigiinngitsunik isumaqartoqarpoq qanoq annertutigisumik allatigut inuussutissarsiutinik ingerlatsisoqarsinnaanissaa sumiiffimmi akuersissuteqarfiusumi, taamaammallu Naalackersuisut pissutissaqartinngilaat tamanna piffissami matumani allannguiffigissallugu. Tamanna aamma ersersinneqarpoq tusarniaanermi akissutigineqartuni, siunnersuut pillugu tusarniaasoqarnerani.

14.5. -imut

Siunnersuut naleqqussarneqarsimavoq, maannakkullu siunnersuummi § 7,3-mi aalajangersaasoqarsimavoq, taannaalu allaavigalugu Naalackersuisut nalilersuisartutut ataatsimiititaliami ilaasortassanik toqqaasarnermut, siulittaasumik toqqaasarnermut aammalu taasisarnermut aalajangersaasinnaapput. Pisuni kommuni isumaqarsimappat inunnut Naalackersuisut sinnerlugit toqqarneqarsimasut akornanni arlaannaannulluunniit atasuunnginnissaq eqqortinneqanngitsoq nalilersuisartutut ataatsimiititaliami, tamanna pillugu kommuni naalackersuisoqarfimmut suliaasaqartuusumut nalunaaruteqarsinnaapput.

14.6. -imut

Periarfissaavoq akuersissummi nalimmassaasoqarsinnaanera, tak. periarfissaq suliffeqarfiup ingerlatsinissamut pilersaarutaanik allannguinnissamik akuersisoqarsinnaanera. Tamanna tassaaginnassanersoq maanna akuersissutaasumik annertunerulersitsineq, imaluunniit piviusumik nutaamik akuersissuteqarneq sumiiffimmi pineqartumi tassani, ingerlatsinerit suunerinik tunngaveqassaaq.

14.7. -imut

Piginnaatitsissummi Naalakkersuisut pisinnaatinneqanngillat aalajangiisinnaanermut kikkut suliffeqarfimmi atorfinitsinneqarsinnaanerannik. Tamatuma saniatigut takukkit 10.8. -mi nassuiaatitut oqaaseqaatit.

14.8. -mut

Isumaliutaanngilaq aalajangersakkap atorneqarsinnaanissaa unammilleqatigiinnermik innarliisinnaanernut pissutsinut ataasiinnarmik ingerlatsisoqarfiusuni, Naalakkersuisullu takornariartitsisartunik peqqusisussaapput ingerlatsisumik atuisussaannermik. Tamatuma saniatigut takukkit nassuiaatitut oqaaseqaatini 10.8.

14.9. -mut

Aalajangersagaq siunnerfeqarpoq pinngitsuuinissamik pisunik akuersissuteqartoqarsinnaanerannik inummut suliassamik aningaasatigut kivitsisinnaanngitsumut. Pigisanik "tamakkiisumik atuisinnaaneq" isumaqarpoq akornutissamik pilersitsisoqarsimanngitsoq, assersuutigalugu aningaasaatinik akiliussigallarnermut atuisimanikkut assigisaasigullu. Siunnerfiunngilaq suliffeqarfiit aningaasanik tigoriaannarnik amerlasuunik peqareertarnissaat, akuersissuteqarfigineqassagunik. Naalakkersuisut tusarniaavigineqartoq isumaqatigaat tamanna suliffeqarfinnut / inuussutissarsiortunut pissusissamisuuksanngimmat. Suliffeqarfiit aamma inuiaqatigiit tamaannarmik pissarsiviginerussavaat aningaasat pigisat erniortinneqarpata sulisillugit.

14.10. -mut

Takukkit nassuiaatitut oqaaseqaatigineqartut 1.1. -imut.

14.11. -imut

Siunnersuutitut missingersuusiami allannguisoqarpoq. Akitsuusiisarneq pillugit aalajangersakkat maanna §§ -ini 20-22 oqaasertalerneqarput. Allannguneq pivoq erseqqissarniarlugu akitsuutit pineqartut. Aningaasat annertussusissaannik aalajangersimasumik aaqqissuussisoqarpoq. Tamanna kaaviiartitanut akitsuutitut aaqqissuunneqanngilaq. .

14.12. -imut

Ingerlatsinissanut pilersaarussiaq suliarineqaqqaartoq nalinginnaasumik suliarineqarsimasarpoq suliffeqarfiup akuersissummut atasumik neqeroornerani. Aaqqiissuteqartoqassappat imaluunniit allannguisoqassappat naatsorsuutigineqanngilaq tamanna sivisuumik suliap passunneqarnerannik kinguneqassasoq. Pisariaqarsinnaavorli tusarniaasariaqarneq annertuunik allannguisoqarsimappat allanut sunniuteqarsinnaasunik.

Tusarniaanermi siunertaasarpooq aalajangiinerup pilersinneqartup naammattunik tunngavissaqartumik suliaanissaa.

14.13. -imut

Aalajangersakkami piginnaatitsissummik pigisaqartoq pisussaaffilerneqarpoq ukiumoortumik nalunaarusiortarnissamut. Naalakkersuisut tusarniaavigineqartoq isumaqatigaat pissusissamisuussanngimmat qaammatit pingasukkaanik nalunaarusiortarnissaq.

14.14. -imut

Paasissutissanik avitsisarnissamik pisariaqartitsinermut taamaallaat pissutaavoq akuersissummik suliaqarnermik ingerlatsineq. Assersuutigalugu paasissutissat qinnuteqartoqarsimaneranik, Naalakkersuisoqarfiullu oqaloqateqarnermik aallartitsisarnera tunngaviumik pilersaarutitut qanoq paasissutissat sunnuteqarnerisut, aammalu sumiiffimmi uumasut tunngavigineqartut amerlassusiinik nalilersuinerit imaluunniit tamakkua assigisaat. Aalajangersagaq atorneqartussaannilaq paasissutissat allanut tunniunneqartarnissaannut Namminersorlutik Oqartussat suliffiutaanni, niuerfiusumi unammilleqatigiinnermik innarsiisussamik.

14.15. -imut

Aalajangersagaq ilanngunneqarpoq erseqqissarumallugu piginnaatitsissummik pigisaqartup akuersissutip atorunnaarnerani illuutit, atortut il.il. qimaannarsinnaanngikkai. Sanaartukkat piusut, illuutit il.il. allamut tunniunneqarsinnaagunik /pisiaritinneqarsinnaagunik, taava tamanna soorunami piuminarnerussiaq. Aalajangersagaq aamma atuarneqartussaavoq isiginiarlugu piginnaatitsissummik pigisaqartup qanoq sanaartukkanik aaqqissussisimaneraniit, akuerissummut tunniunneqarsimasumut atatillugu, taakkualu assigiinngissinnaaqaat. Sumiiffimmi sanaartorneqarsimasunut assigisaannullu aammalu ingerlatsisoq sumiiffimmi qanoq ingerlatsilereersimanagera aallaavigalugu qanoq sivistutigisumik piffissaliisoqassanersoq oqimaalutarneqassaaq. Tamannali aamma oqimaalutarneqassaaq suliffeqarfik atorunnaalernersoq, Naalakkersuisullu inissisimalersinnaanersut suliami akisussaasuerutissappat isiginiarlugit.

15. Aningaaserivik Grønlandsbanken allappoq:

Tusarniaavigineqartup akissuteqaatai tusarniaassutigineqartoq una aammalu Takornariartitsinermut, sumiiffinni nunami aalajangersimasuni zone-nut agguasarneq il.il. inatsisissatut siunnersuutaasumut attuumassuteqarput. Ataaniittuni aallaavigineqarput takornarissanut neqerooruteqarsinnaanermut inatsisissatut siunnersuummut oqaaseqaatit suliassaqarfinni pineqartuni.

15.1 Tusarniaavigineqartup oqaatigaa naatsorsuutigineqartoq Kalaallit Nunaanni takornariatitsinermi ataatsimut anguniagaasut makkuusut:

- Takornariatitsinerup aningaasarsiutiginerani malunnaatilinnik siuariaateqartitsinissaq,
- Ingerlatsinerit Kalaallit Nunaanni sumiiffinnut amerlanerusunut siaruarterneqarnissaat,
- Najukkani naleqarnerulersitsinissat, aamma
- Naleqarnerulersitsinerup inuiaqatigiinni amerlanerusunut siaruarternissaa.

Tusarniaavigineqartup oqaatigaa siulianiittut peqataassasut inuiaqatigiinnik ineriartortitsinermut, qularnaarissasullu pitsaanerpaamik inuiaat akornanni takornariatitsinerup paasineqarnissaanut. Oqaatigineqarpoq tamatuma iluatsinnissaa periarfissaqarluartoq isiginiaraanni annertoorujussuarnik aningaasalersuisoqarsimasoq timmisartut mittarfeqarnerannut, Kalaallit Nunaata akiitsuisa malunnaatilimmik annertusinerisigut. Taamaasilluni aningaasaliissutit erniortitsiviusussaapput, pissallutillu aningaasarsiornikkut ingerlatsinerup annertunerulersinneratigut, tassanilu takornariatitsinerup ineriartortinneqarluni annertuumik qaffariaateqartinneratigut, aalajangiisuusumik pisut iluatsinnissaannut.

Oqaatigineqarpoq malunnaatilimmik takornariatitsinermi qaffariaateqartoqanngippat aarlerinaateqalersinnaasoq timmisartunut mittarfiliortitsernertut aningaasaliissutit maanna aningaasarsiornermit akilersorneqartariaqarnissaa, inuiaqatigiinni kikkunnut tamanut ajoqutaalersussamik. Takornariatitsinermi aningaasarsiornerup siuariartorfiunissaa aalajangiisuusumik pingaaruteqarpoq. Taamaasilluni pingaaruteqarpoq takornariatitsinermut atatillugu killiliussat qularnaarnissaat, aningaasalersuisoqarsinnaanngorlugu naleqarnerulersitsiviusuni tamani, nunallu immikkoortortaani nutaamik ingerlatsiviulersuni. Tusarniaavigineqartup naliliineraa aningaasarsiornermik malunnaatilimmik perrassaasoqarnissaa ineriartortitsinikkut naammattumik nutaanik aningaasaliissusersuinikkut ilisimasanillu aallertarnikkut ingerlanneqanngippat nunani allani aningaasalersuisartunit ingerlatsisunillu pisunik maanna ingerlatsisuusut peqatigalugit naammattumik inerikkiartortitsisoqarsinnaanngitsoq.

Tusarniaavigineqartoq isumaqarpoq siunnersuummi anguniakkanut siuliani eqqartorneqartunut naapertuuttuusut, kisiannili tusarniaavigineqartoq isumaqarpoq sakkussat aqqissuusat naammattumik naammassisaqarfiusinnaanngitsut. Tamatumunngalu tusarniaavigineqartoq isumaqarpoq siunnersuutikkut apeqquserneqarsinnaasoq Kalaallit Nunaat nunatut aningaasalersuiffiusinnaasutut.

Tusarniaavigineqartup oqaatigaa nunanit allaneersup piginnittuusup inatsisunik unioqutitsinani taamaallaat annerpaamik 33 % -inik piginnittuusinnaangorlugu tassaasoq utimoortumik/kingumoortumik inatsisiliorneq, tamannalu ataatsimut nalornilersitsisinnaasoq tatiginartumik inatsisit atuuttut isigineqarsinnaanersut pillugu. Tusarniaavigineqartup erseqqissaatigaa tamatumunnga atatillugu Naalakkersuisut isumaqarsorinartut kalaallini inuiaqatigiinni pissutsit inissisimanerat piginnittuunermiittoq. Tamatumunngalu atatillugu oqaatigaat piumasaqaataanngimmat suleqatigineqartup Island-imi imaluunniit Savalimmiuni inatsisiliornermiinnera. Tusarniaavigineqartullu ilanngullugu oqaatigaa kalaallini inissisimaneq / aallaaveqarneq aamma tassaasinnaasoq piumasaqaat najukkani innuttaasunik sulisoqarnissamik, imaluunniit piumasaqaat uppersarsarneqarsinnaasumik ilinniagaqarsimanissaq aamma piginnaasanik annertusaaneq kalaallinik sulisussani.

Tusarniaavigineqartumut takujuminaappoq sooq Kalaallit Nunaat mattutissanersooq aningaasaliiumassutsimut avataaneersumut, aningaasaliisussanut piumasaqaateqarnikkut, aningaasalersuisut 1/3 -imit annerusunik piginnittuusinnaangitsut aningaasaliissutaasuni, aningaasaliisartup 100 % -imik akileeqataaffigeriigaani. Tusarniaavigineqartup oqaatigaa ilanngullugu ilutigisaanik anguniagaasariaqartoq takornariartitsinermi aningaasalersuisoqarnissaa sumiiffinni nutaani aamma Kalaallit Nunaanni illoqarfinni minnerusunik, ullumikkut annertunerusunik takornariartitsiviusangitsuni. Tusarniaavigineqartoq isumaqarpoq piviusorsiornerunaviangitsooq najukkani ingerlatsisut naqqaniit aallartittarnissaat suleqateqaratik ingerlatsisooreersunik suliassaqarfinni allani. Tusarniaavigineqartup oqaatigaa nunanit allaneersut piginnittuusinnaanerannik killiliineq tassaassasoq takornariartitsinerup sumiiffinni nutaani ineriartornissaanik killiliineq.

Tusarniaanermi akissummi tusarniaavigineqartup innersuuppaa anguniagaasoq ”killiliussanik iluaqutaasussanik siuarsaaneq” periusissiami taaguuteqartumi ”Takornariartitsinermi 2023-2024 ikaarsaariarnermut periusissiaq”. Tusarniaavigineqartorli isumaqanngilaq siunnersuut killiliussanik iluaqutaasussanik siuarsaaneersoq, siunnersuut minnerulersitsisinnaammat piumassutsimik Kalaallit Nunaanni takornariartitsinermut aningaasalersuinissamat, ilutigisaanillu Kalaallit Nunaanni namminermi aningaasaliissutissanik nalorninarsinnaasunut atussallugit piumassuseqartunik naammattunik soqarani, takornariartitsinerup ineriartortinneqarnissaanut atorneqarsinnaasunik.

- 15.2 Tusarniaavigineqartup isumaqatigaa Kalaallit Nunaanni takornariartitsinermik inuussutissarsiutit piffissap ingerlanerani kalaallit amerlanerusunit suliffiulertariaqartut. Tamatumunnga atatillugu tusarniaavigineqartup oqaatigaa inatsisissatut siunnersuummi sutigulluunniit akornutissaqanngimmat kalaallit piginnittuusinnaanerat ingerlatsivinni avataaneersuinnarnik sulisoqartuni, taamalu iluaqutaassanani nunatsinni piginnaasanik ineriartortitsinermut suliffissanulluunniit. Tusarniaavigineqartoq isumaqarpoq aaqqissuussanik piunasaqaatit piginnittuunissamut pisariaqartunik piginnaasanik ineriartortitsineq pilersittanngikkaat. Piginnaasanik ineriartortitsineq – qaffasinnerulersitsineq pisariaqartitsiviussaaq piffissami sivilunerusumi suliniutinik ingerlatsisoqarnissaanik, Namminersorlutik Oqartussallu angusaqarnerussallutik takornariartitsisartunik ilinniartitaanernilu ingerlatsivinnik suleqateqarnikkut, periarfissaqalersitsiviusunik sulisussat maaniamiut takornariartitsinermik ingerlatsisuni suliaasanik assigiinngitsunik ingerlatsilernissaannut.
- 15.3 Tusarniaavigineqartup ataatsimut isigisumik inatsisartut inatsisaannut isummersuutigai aaqqissuussineq taaneqartoq ”one size fits all”, takornariartitsinermik ingerlatsinerit tamarmik inatsisitigut aquneqarnissaannik kinguneqartoq. Kisiannili inatsisissatut siunnersuummi atorneqarluni ”sumiiffinni immikkut toqqakkani”, tamatumalu takutillugu nunap immikkoortuinut aalajangersimasunut killilersuineq. Isumaqarluarlunilu piniarnikkut tammajuitsussarsiniartunik takornariartitsisarneq, imaalillugu qanoq piniarnerup annertutigineranik nakkutilliisoqarluni, tassani aamma kalaallit piniartut pissusissamisoortumik pisariaqartitsinerannik. Taamaakkaluartoq tusarniaavigineqartup misigaa siunnersuut imaqartoq pisinnaatitsissummik qinnuteqartoqaqaartussaasoq akuersissummillu takornariartitsinermut atasuni ingerlatsinerni.

Tusarniaavigineqartup oqaatigaa ullumikkut takornariartitsinermik ingerlatsinerit ilaat imaatigut angalaarnerusartut aalisarnertalimmik, arfernik takusassarsiornernik imaluunniit nunakkut angalaarnerusarlutik il.il. Pisuni taamaattuni naammattunik killilersuuteqartutut ippoq, piunasaqaateqarluni angallatip annertussusissaanik aamma sillimaniarnikkut aaqqissuussisoqarnissaanik il.il. Tusarniaavigineqartup isumaa naapertorlugu pisuni taamaattuni ingasattajaarneruvoq akuersissuteqarnissaa. Kisiannili pisuni immikkut ittuni, assersuutigalugu nannunut atasuni, tamanna pissusissamisoorsinnaagunarpoq. Aamma tusarniaavigineqartoq isumaqarpoq tamanna aamma atuuttoq kangerlunni “aalajangersimasunik” tammaarsimaarfiliortarnernut.

15.4 Tusarniaavigineqartup paasinninneraa manna ”Kalaallit Nunaanni inuit allattorsimaffianni nalunaarsorsimavoq minnerpaamik ukiuni kingullerni 5 -ini”, tamannalu paasineqassaaq inuk qinnuteqannginnermi ukiuni 5 -inik kingullerni najugaqareersimassasoq. Tusarniaavigineqartup oqaatigaa tamanna kalaallinut Kalaallit Nunaata avataani ilinniagaqarumallutik najugaqarsimasunut ajoqutaalluinnartoq, imaluunniit nunani allani suliffeqarsimasunut, Kalaallit Nunaannullu uterusuttunut.

Tusarniaavigineqartoq isumaqarpoq inuit allattorsimaffianni ukiuni 5 -ini nalunaarsorsimanissamik piumasaqaat peerneqassasoq, inatsisissatut siunnersuutini marluusuni piumasaqaatit assigiissilerlugit, imaluunniit piumasaqaat kalaallinut atasuunermik piumasaqaatinngorlugu ataatsimut naliliinermik tunngavilik.

15.5 Tusarniaavigineqartup kissatigaa paasisinneqarnissi oqaaseqaatigineqartut § 21 -imut [maanna § 20 tulliilu] tassani ersilluni akiliutissat arlaqartut, isumaliutaasut ataatsimut akitsuusiinissamik 130 kroninik inummuk ullormut.

Tusarniaavigineqartup innersuuppai Savalimmiut unnuinermut akitsuuteqarfiusut 20 kr. -inik.

15.6 Tusarniaavigineqartup pissusissamisoortutut isigaa inatsisiliortoqassasoq siunissami ingerlatsisuulertussanut, maanna ingerlatsisunuunngitsoq.

Naalackersuisoqarfiup sulianut oqartussaasup oqaaseqaatai:

15.1. -imut

Takukkit nassuiaatitut oqaaseqaatit 1.1. -imut.

15.2. -mut

Toqqaasarnermi atugassarititaasuni siunnersuutigineqartumi § 10-mi, naleqquppoq qinnuteqartup qanoq annertutigisumik najukkani sulisussanik nioqquteqartartunillu atuinera. Tamatumalu saniatigut siunnersuut imaqarpoq Naalackersuisut malittarisassiorsinnaanerannik sulisussanik maani najugalinnik aamma nioqquteqartartunik atuisarnernut. Naalackersuisut tusarniaavigineqartoq isumaqatiginngilaat piginnaatitsissummik pigisaqartup imaaliinnarluni suliffimmi atorfiit avataaneersunik sulisussanik inuttalersinnaassagai.

15.3. -mut

Siunnersuut siunnerfeqarpoq sumiiffinnik killilikkanik aqutsinissamik, periarfissaqartitsisunik kisermaassiffiusussatut, aalajangersimasunik takornariartitsissutinik neqerooruteqartarfittut akiliuteqarnikkut. Tamanna aaqqissuussineruvoq siunertaralugu

piginnaatitsissummik pigisaqartup misigisassarsiortarneq immikkut ittut aaqqissuuttassagai, tamatumunngalu atasunik aningaasalersuilluni.

15.4. -mut

Takukkit nassuiaatitut oqaaseqaatit 1.1.-imut

15.5. -imut

Siunnersuummi allannguisoqarpoq. Akitsuutinut atatillugu aalajangersakkat maanna oqaasertalersugaapput §§ -ini 20-22. Allannguutit pilersinneqarput akitsuutit erseqqissarumallugit. Akitsuut aalajangersimasumik aningaasartaligaavoq. Unnuinermut akitsuutaanngilaq. Aningaasat 130 kronit akiliuteqartitsinikkut aalisartitsisarnernut atavoq.

15.6. -mut

Naalackersuisut pissusissamisoortutut nalilinggilaat inatsisartut inatsisaat atortuulersinneqassasoq piginnaatitsissummik pigisaqartunut nutaanut. Maanna akuersissummik pigisaqartut qanoq sivisutigisumik ikaarsaariarfeqarnissaanni apeqqutaapput allannguutit qanoq annertugineri. Naalackersuisut naliliipput piffissaq ikaarsaariarfittut aalajangerneqartoq naammassasoq.

16. Ineqarnermut Attaveqaasersuutinullu Naalackersuisoqarfik allappoq:

16.1 Tusarniaavigineqartup oqaatigaa suussusilersuutit imaqarnerusut paasinernerullutillu maanna inatsimmi § 3-mut sanilliullugit. Tamannalu tusarniaavigineqartup iluarisimaarnartippaa. Taamaattoq tusarniaavigineqartoq isumaqarpoq iluaqutaassasoq suussusilersuutit naapertuuppata taaguusersuutinut siunnersuummi ” Takornariartitsinermut, sumiiffinni nunami aalajangersimasuni zone-nut agguaasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaanniittunut.

Tusarniaavigineqartup iluarisimaarpaa taaguutit “kalaallit nioqqutissanik tunisaqartartut” aamma ”kalaallit sulinermik inuussutissarsiuteqartut” kinaassusersiortuunnginneri piviusorsiortuullutillu.

Tusarniaavigineqartup iluarisimaarpaa atugassarititaasut § 13, imm. 1 -imi [maanna § 10] toqqaasarnermi atugassarititaasunik aalajangersaasarnermut akuersissutinik neqeroortitsinerni naleqquttuummata, objektiviullutik kinaassusersioratillu.

16.2 Tusarniaavigineqartup siunnersuummi § 19 -imut [maanna § 12] oqaatigaa inummut akuersissummik tunniussisarnermi Kalaallit Nunaanni inuit

allattorsimaffianni allassimasimasumut “piffissami ataatsimoortumi minnerpaamik ukiuni 5 -imi qaangiuttuni”. Tusarniaavigineqartup oqaatigaa piffissami imminut atasumi pineqartoq naatsorsuutigineqartoq.

Tamatumalu saniatigut tusarniaavigineqartup aamma oqaatigaa pissusissamisuumngitsunik kinguneqarsinnaasoq piffissami ukiunut 5 -inut annertusinissaa. Matumanissaaq inuup pisariaqartissinnaagaa piffissap ilaani inuit allattorsimaffianni sumi allassimaneq taarserallassallugu, ingasattajaarnerussallunilu akuersissummik ingerlatsisinnaanerup atorunnaarsinnissaa. Tamatumunngalu ilaliullugu tusarniaavigineqartup oqaatigaa isumaliutigisariaqartut pissusissamisuumngitsunik kinguneritinneqarsinnaasut § 19, imm. 2 [Pisinnaatitsissummik piginnittup piumasaqaatinik piffissami akuersissuteqarfiusumi tamani naammassinnittussaananeranutpiumasaqaatit maanna § 4, imm. 2-mi allassimapput] aalajangiippat piumasaqaataasut § 19, imm. 1 [maanna § 12] naammassineqarsimassasut piffissami akuersissuteqarfiusumi tamarmiusumi.

Tusarniaavigineqartup siunnersuutigaa aalajangersakkamik ilanngussisoqassasoq pisinnaatitsisumik aalajangersakkap sanioqqunneqarsinnaaneramik, piumasaqaammut Kalaallit Nunaanni inuit allattorsimanissamut atasumik. Sanioqqutsisinnaaneq assersuutigalugu tassaasinnaavoq periarfissaq immikkut akuerissuteqartoqarsinnaaneranut, piffissap ilaani inuit allattorsimaffiannik taarsiisinnaanermut.

Atugassarititaasut allat § 19, imm. 1 nr. 2-5 -mi [maanna § 13] tusarniaavigineqartup naapertuuttuunerarpaa.

- 16.3 Tusarniaavigineqartup oqaatigaa isumaliutersuutigineqartut § 19 -imut [maanna § 12] aamma atuuttut assigisaanik § 20 -imut [maanna § 13]. Tusarniaavigineqartup innersuuppaa tamatumunnga atatillugu immaqqa sanioqqutsisinnaanermut aalajangersagaqarsinnaanera, Kalaallit Nunaanni inuit allattorsimaffianni ukiut qaangiuttut 5 -it pillugit.
- 16.4 Piginnaatitsissummik pigisaqartup ”kalaallinik sulineramik inuussutissarsiteqartunik aamma kalaallinik nioqqutissanik tunisaqartartunik” atuinissaata ingerlatsinissamut pilersaarummiinnissaanut tusarniaavigineqartoq isumaqarpoq tamanna ingerlatsinissamut pilersaarummi qaammarsaavigissallugu pingaartuusoq, ilutigisaanillu isumaqarluni aalajangersagaq piviusorsiortoq assigiinngisitsinanilu.

16.5 Piffissamut ikaarsaariarfiusussatut siunnersuutigineqartumut atatillugu tusarniaavigineqartup oqaatigaa inuup imaluunniit inatsisit naapertorlugu inuup soorunami periarfissaqarfiginngikkaa najugaqarsimanissamik piumasaqaat Kalaallit Nunaanni piffissami imminut atasumi ukiunik 5 -inik sivilissusilimmi naammassisinnaanngikkaa, 1. januar 2026 sioqqullugu.

16.6 Tamatuma saniatigut tusarniaavigineqartup oqaasertanut atatillugu oqaaseqaatit ilannguttarsimavai.

Naalackersuisoqarfiup sulianut oqartussaasup oqaaseqaatai:

16.1. -imut

Anguniarneqarsimavoq qularnaassallugu periarfissaqarfiusuni oqaasertalersuutit assigiissaaneqartarnerat. Taamaattoq inatsisini pineqartuni marluusuni arlariinni taaguusertuutit assigeeqqissaanngillat pissutsit assigiinngitsut marluk aalajangersaaffigineqaramik.

16.2. -mut

Naalackersuisut oqaasertaliineq naleqqussarsimavaat tusarniaavigineqartumit oqaatigineqartut tunngavigalugit.

Tamatuma saniatigut innersuunneqarpoq 1.1.

16.3. -mut

Takukkit nassuiaatitut oqaaseqaatini 1.1. Siunnersuummili maluginiarneqassaaq immikkut akuersissuteqarsinnaaneq § 8-mi ilanngunneqarsimammat, taannalu aallaavigalugu piumasaqaatit §§ 12-15-imi aammalu §§ 17-18-imi kiisalu siunnersuummi aalajaangersakkat allat pillugit Naalackersuisut piumasaqaatinut immikkut pisoqartillugu immikkut akuersissuteqarsinnaalerput.

16.4. -mut

Oqaaseqaateqarnissamut pissutissaqartitsinngillat.

16.5. -imut

Takukkit nassuiaatitut oqaaseqaatini 1.1.

16.6. -imut

Siunnersuummi oqaaseqaatigineqartunik oqaasertalersuinermit tunngasut siunnersuummi annertuummik ilaapput.

